

فريق تفرغ
م. علاء حامد

دراسة عقيدة المسلم


6

شرح كتاب
أصول الإيمان

م. علاء حامد



كتاب
أصول الإيمان
في ضوء الكتاب والسنة
إعداد
مُجْتَمَعِ الْعُلَمَاءِ
الدار العالمية
للنشر والتوزيع



الحمد لله وأشهد أن لا إله إلا الله وحده لا شريك له وأشهد أن محمداً عبده ورسوله صل الله عليه وسلم أما بعد:

مازلنا نشرح كتاب أصول الإيمان هذا الكتاب الطيب الميسر في عقيدة أهل السنة والجماعة.

لا يدوم الهم أو يبقى التعب
إن بعد العسر يسراً فارتقب.

المرّة الماضية تكلمنا عن أنواع العبادات كالمحبة والرجاء والدعاء وكيف الإنسان يتجنب الوقوع في الشراكيات التي قد تحدث في هذه العبادات النهاردة بإذن الله تعالى عندنا قسمين في الكتاب .. هما موضوعين بالظبط هنتكلم فيهم ، الموضوع الأول قضية القبور

والأفعال التي تشرع عند القبور والأفعال التي لا تشرع عند القبور وحكم بناء المساجد علي القبور والصلاة في المساجد التي فيها قبور ، الموضوع التاني اللي معانا النهارده هو موضوع التوسل وده من أخطر مواضيع العقيدة موضوع مهم قضية خطيرة يكثر فيها الخلل بل يكاد يكون أكثر أنواع الشراكيات في باب التوسل التوسل ده لسوء فهم القضية دي عندما تفهم هذه القضايا في ضوء الكتاب والسنة يتضح الأمر فلا بد أن نتعلم أنه لا يوجد مسألة في العقيدة إلا ولا بد أن يكون عندك عليها دليل واضح من الكتاب أو من سنة النبي صل الله عليه وسلم وهذا هو السبيل إلى معرفة العقيدة زي ما بينا في أول درس خالص هنا في الكتاب قالنا المطلب الخامس هو النهي عن أعمال تتعلق بالقبور.. .

بدأ الأول يقولنا مقدمة بيقول أنه في صدر الاسلام يعنى في أول الإسلام النبي عليه الصلاة والسلام منع الصحابة الكرام رضى الله عنهم من زيارة القبور تماماً وكان ينهاهم عن ذلك .. لماذا؟؟ لأنهم كانوا حديث عهد بشرك لسه طالعين من الشرك وداخلين في الإسلام وكانوا بينهم وبين القبور مواضيع وكانوا ليهم تعظيم والأباء والأجداد والقصص دي فقفل الباب خالص في الأول حتى استقر كيان التوحيد واستقر المسائل في قلوب الصحابة وبعدين فتحلهم الباب تانى فلما حسن الإيمان ورسخ في قلوب الصحابة وانكشفت شُبُهت الشرك عادت مرة أخرى مشروعية زياره القبور يبقى المنع كان بأمر النبي عليه

الصلاة والسلام والفتح تانى أو نسخ الأمر الأول بردو كان بكلام النبى عليه الصلاة والسلام وهذا وضحه الأحاديث التى أوردها فى هذا الكتاب فقال عن بُريده بن الحُصيب قال قال صل الله عليه وسلم: " **كنت نهيتكم عن زيارة القبور ألا فزوروها** " وفى حديث أبى هريرة بين النبى عليه الصلاة والسلام الغاية من زيارة المقابر قال " **زوروا القبور فإنها تذكركم الموت** " وفى حديث أبى سعيد الخضرى " **إنى نهيتكم عن زيارة القبور فزوروها فإن فيها عبرة** " وفى حديث أنس بن مالك " **كنت نهيتكم عن زيارة القبور ألا فزوروها فإنها ترقق القلب وتدمع العين وتذكر الآخرة ولا تقولوا هجراً** " هياتى معنى هجراً أنها الأقوال المحظورة اللى بتتقال عند المقابر ،

لكن هو المصنف هنا أو صاحب الكتاب بين الأول أن الأصل كان المنع من زيارة القبور خالص بعد كده الأمر اتفتح لما استقر التوحيد فى قلوب الصحابة وبعد كده جبنا الأحاديث دى عشان يبين هو إحنا بنزور القبور ليه من الذى ينتفع بهذه الزيارة والمنافع دى بتعود على مين بأنهي طريقة .. هناك منفعة تعود عليك أنت وهناك منفعة تعود على المقبور ، أما المنفعة التى تعود عليك أنت فهى ما ذكرها فى الأحاديث الثلاثة اللى قولتلكم : تذكر الموت ، هى عبرة ، ترقق القلب ، تدمع العين هذه هى الأمور اللى ينبغى أن تكون عندما تزور أنت القبور .. والميت ماذا ينتفع بالزيارة ؟ ينتفع بالدعاء عشان كده الحديث الرابع اللى جبهولنا على طول قال عن بُريده كان رسول الله صل الله عليه وسلم يعلمهم إذا خرجوا إلى المقابر فكان قائلهم يقول " **السلام عليكم أهل الديار من المؤمنين والمسلمين وإنا إن شاء الله بكم لاحقون أسأل الله لنا ولكم العافية** "

يبقى هى فيها التذكرة وفيها الدعاء للمقبور وده يتضح بأن الحقيقة أن المقبور هو الذى ينتفع بزيارة الزائر وليس العكس فإن المقبور لا يملك أى شئ للحى ، الميت لا يملك أى شئ للحى لكن الحى مازال يملك أشياء للميت كالدعاء والصدقة الجارية وغير ذلك من العبادات اللى ممكن يقضيها يعنى يعملها عنه زى الحج زى العمرة زى الصدقة زى قراءة القرآن على قول بعض أهل العلم.. الحى هو اللى بينفع الميت أما الميت فهو لا يستطيع أن ينفع الحى إذا مات ابن آدم انقطع عمله إذا كان هو عمله نفسه انقطع فكيف يعمل لغيره أو ينفع لغيره أو يستجيب لغيره هذا من الخبل فبالتالى قال جل فى علاه " **إِنَّمَا يَسْتَجِيبُ الَّذِينَ يَسْمَعُونَ** "

ثم قال " ۞ وَالْمَوْتَى يَبْعَثُهُمُ اللَّهُ ثُمَّ إِلَيْهِ يُرْجَعُونَ " قال " إِنْ تَدْعُوهُمْ لَا يَسْمَعُوا دُعَاءَكُمْ وَلَوْ سَمِعُوا مَا اسْتَجَابُوا لَكُمْ " قال " وَمَنْ أَضَلُّ مِمَّنْ يَدْعُوا مِنْ دُونِ اللَّهِ مَنْ لَا يَسْتَجِيبُ لَهُ إِلَى يَوْمِ الْقِيَمَةِ وَهُمْ عَنِ دُعَائِهِمْ غَفُلُونَ " قال جل فى علاه " إِنَّكَ لَا تُسْمِعُ الْمَوْتَى وَلَا تُسْمِعُ الصُّمَّ الدُّعَاءَ إِذَا وَلَّوْا مُدْبِرِينَ " مش كده ولا أي " وَمَا أَنْتَ بِمُسْمِعٍ مَّنْ فِي الْقُبُورِ إِنْ أَنْتَ إِلَّا نَذِيرٌ "

A l a a H a m e d

فدلت هذه الأشياء أن المقبور لا يستطيع أن ينفع الحي بأى شىء فهدف الزيارة الحقيقة النفع اللى بيعود عليك مش من المقبور إنما بيعود عليك من الإيمانيات التى بتكتسبها من زيارة القبر من رقة القلب , دمع العين , تذكر الموت حتى الكلمة اللى بنقولها وأنا إن شاء الله بكم للاحقون المفروض تهزك من جوه تستشعر أنك غداً ستكون تحت هذا القبر ستكون أنت الذى يدعى لك أنت التى ترجو دعوة من شخص صالح يمر بهذا القبر فيذكرك , اللهم اغفر لفلان اللهم تجاوز عنه فعل دعوة من هذه الدعوات تغير حالك من حال إلى حال.. لكن مسكين هذا الذى يطلب من الميت الأشياء فالميت لن ينتفع منه بشىء ولا الحى ينتفع من الميت بشىء يعنى لا هو نفع الميت ولا الميت نفعه والميت كان يحتاج منه هو الذى يحتاج منه لأي شىء فضيع هو ثواب دعاء للميت وهو وقع فى المحظورة فى الشراكيات , لذلك بيقول هنا الأهداف من زيارة القبور فى الحقيقة هى أول شىء التزهد فى الدنيا , تذكر الموت , تقوية اليقين , والصلة بالله الأمر الثانى الإحسان إلى الميت نفسه بالترحم عليه وطلب المغفرة وسؤال العفو له واللى بيقول بقى من ادعى غير ذلك فليأتى بالدليل والبرهان الناس اللى بتروح عند القبر تقعد تحكى وتتكلم وتقعد تحكى للميت حكاوى يأتينى بدليل أن الميت ينتفع بهذا الكلام أو يسمع بهذا الكلام فضلاً إن هو يذهب لقبر رجل صالح فيقوله ادعيلى ربنا أو كذا ده هيأتى حكمه أو الأسوأ وأضل سبيلاً إن هو يطلب منه الحاجات أو تفريح الكروبوات فيقول اشفيلى ابنى, نجحلى بنتى, الحقنى ياسيدى فلان انقذنى, طلعنى من الأزمة المادية ليك عليا هذبلك ليك عليا وادى نذر أهو وتبقى العملية تقع فى الشرك الأكبر واتكلمنا عن نوع الشرك الأكبر المرة اللى فاتت , بيقول ثم أن السنة جاءت بالنهى عن أمور عديدة وتعلقها بالقبور وزيارتها صيانة للتوحيد وحماية لجانبه يجب على كل مسلم أن يتعلمها ..

الأمر الأول يقول النهى عن قول الهجر أى قول الهجر بقى الي جه فى الحديث قال عليه الصلاة والسلام ولا تقولوا هجرا يقول المراد بالهجر كل أمراً محظوراً شرعاً أى حاجة

محظورة شرعاً في هذا المقام يأتي في مقدمة ذلك الشرك بالله بدعاء المقبورين وسؤالهم من دون الله والاستغاثة بهم وطلب المدد والعافية منهم فكل ذلك من الشرك البواح والكفر الصراح فلا يجوز للإنسان أنه يسأل الميت أو يدعوه أو يطلب منه معنى أى شيء من هذه الأشياء وزى ما قولنا حتى الإنسان يقعد يكلم الميت والله أعلم لا يسمع الميت ذلك يعنى إحنا بنقول الأصل عندنا إنك لا تسمع الموتى ده الأصل لازم الأول أنت تحط الأصل وتشوف الفرع الأصل والاستثناء .. الأصل أنه مبيسمعكش ده الأصل خالص ، الاستثناء ما دل عليه الدليل زى أيه ؟ زى السلام عليكم يا أهل الديار هذا السلام يسمعه الميت أم لا يسمعه ؟؟

يسمعه وإلا لم يكن له فائدة هل يمكن النبي عليه الصلاة والسلام يشرع لنا سلام والمسلم عليه لا يسمع وليس له فائدة يبقى يقيناً المقبور يسمع هذا السلام وقد يسمع أيضاً إذا الدعاء له ده أقصى ما جاء فيه الدليل لكن أكثر من كده لم يأتى فيه دليل يبقى أنت مينفعش تعمل زى ما بيعملوا البعض يقف على قبر الميت أول ما يدفن الميت يافلان ابن فلان إذا جاءك الملك وقال لك مش عارف إيه فقل له كذا وإذا جاءك الملك وقال لك من نبيك قل محمد يقعد بقى يمليه إجابات الأسئلة لكن الموضوع سهل لو الموضوع بيتملى والإجابات بتتملى الحى يملى الميت هو لا يمكن أن يسمع دى بالذات ده بيبقى اختبار خاص بيه من ربك مادينك من الرجل الى بُعث فيكم ؟ ثم إنه حتى الأسئلة دى مش بتجيله دلوقتى بعد ما الناس تمشى كما جاء فى الحديث حتى يسمع قرع نعلهم أو ماتبتدى الأقدام تخف خالص ينزل عليه الملكين دول من ربك مادينك من الرجل الى بُعث فيك؟ ف كونك أنك تملية إجابات أو تحكيه أو كل واحدة تيجى تزور جوزها وتقعد تحكيه ولاده حصلهم أيه وأييه اللى حصل لعياله أنت سبتنا و عملتنا كل هذا من تضيع الوقت ومن الهراء لأن الميت لا يسمع كل هذا إنما الذى دل عليه الدليل أن الميت يسمع السلام عليه إذا سلمت عليهم ويسمع الدعاء إذا دعوت الله لهم لكن أكثر من ذلك نحن نقتصر على الدليل هو ده الوسط فى المسألة لان انا عندى الاصل " **وَمَا يَسْتَوِي الْأَحْيَاءُ وَلَا الْأَمْوَاتُ ۚ إِنَّ اللَّهَ يُسْمِعُ مَن يَشَاءُ ۚ وَمَا أَنْتَ بِمُسْمِعٍ مَّن فِي الْقُبُورِ** "

قف دون رأيك في الحياة
مجاهداً
إن الحياة عقيدة وجهاد

الأصل أنه مبيسمعش حاجه الدليل طلعلى حاجتين هما دول بس ماخذتش بقى الدليل اللى طلعلى حاجتين أقول هما دول بس مجيش بقا وأقوم موسعهم إن الميت بيسمع كل حاجه ولا اضايق وأقول ده لا بيسمع السلام ولا الدعاء دل الدليل أنه بيسمع السلام والدعاء له إحنا نقف عند الدليل وخلاص نقول لا نزيد عليه من غير دليل ومن أدعى إن الميت يسمع ده إحنا بنقول يسمع بس مش بيستجيب كمان يسمع ليس عليه دليل فضلاً بقى إنه يستجيب أو يرد أو إن هو ينفعك بشيء أو يتفاعل مع المشكلة اللى أنت بتحكهاله ، يبقى قول الهجر اللى إحنا قلنا عليه قول منكر عند القبور وبعد كده بيقول وقد ثبت عن النبى عليه الصلاة والسلام أحاديث عديدة فى المنع من ذلك ونهى عن فعل ذلك عن جندب بن عبدالله قال سمعت النبى عليه الصلاة والسلام يقول " **ألا إن من كان قبلكم كانوا يتخذون قبور أنبيائهم وصالحيهم مساجد ألا فلا تتخذوا القبور مساجد إني أنهاكم عن ذلك** " فدعاء الأموات وسؤالهم عن الحاجات وصرف شئ من العبادة لهم شرك أكبر أما العكوف عند القبور وتحرى إجابة الدعاء عندها ومثله الصلاة فى المساجد التى فيها قبور فهو من البدع المنكرة "قال النبى عليه الصلاة والسلام" **لعن الله اليهود والنصارى اتخذوا قبور أنبيائهم مساجد**"

قالت عائشة يحذر ما صنعوا ولولا ذلك ل اتخذ مثلهم ولكنه خشى أن يتخذ مسجداً هو هنا أختصر كام موضوع هيتقالوا بالتفصيل بعد كده يعني هو قال موضوع كبير أوي فى الكلمتين دول .. هو فرق بين اللى بيصرف العبادة وبين اللى بيتعبد لله عند القبر فيه فرق بين الإثنين فى واحد بيعبد المقبور ينذر له يطلب منه صلى له ده كفر أكبر مخرج من الملة تماماً وطبعاً يكون متأول فإكر أنه ينفع كده يكون مخطئ علشان النبى عليه الصلاة والسلام قال إن فى رجل أخطأ قال يارب أنت عبدى وأنا ربك النبى مكفرهوش ليه ؟ قال أخطأ من شدة الفرح تمام فوارد يعني فمش كل فاعل كافر مش هتروح تشوف واحد واقف عند قبر وبيقول مدد يا سيدى فلان تروح مكفره ومموته ، الاول تسأله أنت اللى بتعمله ده غلط يقولك غلط ليه إحنا مبنعملش حاجه تقوله أنت بتدعى الميت يقولك لا مبدعهوش ده أنا بقول مدد بس لا ياعم الحج ما ده دعاء وتقعد تقوله الأدلة وكده وتعلمه ثواب بعض الناس التى يقع فى الشراكيات لايعلم ذلك غالباً ما يقع فى ذلك عامة الناس الناس البسطاء ليس لهم علم لكن اللى عنده علم العادة مبيقعش فى الشراكيات دي ف مش معنى إن أنا أقول إن الفعل كفر إن كل فاعل كافر واضحة المسألة دى عشان مهمة جداً

عشان متخرجش أنت من الباب ده تكفر العالم كلها لا إحنا دلوقتي بنقول الأفعال الكفر ..مين كافر مين مش كافر دى بقى يقصد فيه أهل العلم يشوف بقى الراجل ده كان عنده علم ولا معند هوش علم كان عنده تأويل شبهه عنده ولا معند هوش مخطأ ولا متعمد ناسى ولا فاكّر الحاجات دى هتفرق فى الحكم على الشخص الواحد والقاعده دى ثبتها معايا فى كل حاجه أقولك عليها كفر إن الفاعل غير الفعل إحنا بنقول الفعل كفر طب الفاعل؟ لا هنشوف الفاعل مش كل فاعل يكفر تمام!!؟

النبي عليه الصلاة والسلام حكى عن رجل لما جه يموت قال إن أنا مت فسحقونى واجعلونى رماداً ثم انتظروا فى يوم شديد الريح وذرونى فى الريح ف والله إن قدر الله عليّ ليعذبني إذاً هو يعتقد أنه لو عمل كده ربنا مش هيقدر يجمعه قال فجمعه الله قال عبدى لما فعلت هذا قال من خشيتك يارب ! قال فغفرله وأدخله الجنة !! فهو لو كافر ينفع يتغفرله؟

إن الله لا يغفر أن يشرك به طب إزاي اتغفرله قال العلماء هذا الرجل كان جاهل ربنا عذره اتعذر بالجهل واتغفرله كمان يبقى مش كل فعل كفر لكن لو واحد مننا دلوقتي قال الكلمتين دول وقلد الراجل ده هتخرج أنت من الملة تماماً لأن مفيش حد هنا يجهل أن الله يقدر أن يجمع أي أحد لكن يمكن الراجل ده مكنش يعرف لسبب ما لأنه افتر كده ربنا يجمع الأجسام المتكاملة مثلاً لكن لو أنا مافيش خالص ممكن يفلت هو افتر كده كان جاهل لكن لو واحد فينا جرب يمر بالتجربة دى لما يموت هيموت كافر بالله جل وعلا لأنه عنده علم يبقى أنا عاوز أصل الأصل ده علشان هعيده كتير كل ما أنا بتكلم ، يبقى أى حد بيدعى المقبور أو دعاء المقبور طلب المدد ، طلب الغوث النذر الذبح هذا كفر أكبر .. هو بيقول الحاجة الثانية إن هو بيتعبد عند القبر مش بيعبد صاحب القبر مالهوش دعوة بالمقبور هو بيدعى ربنا عند القبر

, بيحب يصلى عند القبر , بيقرا قرآن عند القبر , يقول هذه بدعة منكرة بدعة منكرة لكن مش كفر أكبر لأنه مصرفش أي عبادة للمقبر ، طيب ليه بيقولوا بدعة وبيقولوا شرك أصغر كمان ، كلمة شرك أصغر معناها أي يا جماعة كل ذريعة أو كل باب ممكن يوصلك للشرك الأكبر فأتنا لما انهارد هدى ربنا عند المقبور بكره هعمل إيه ؟ لما الاقى ربنا استجابلى هقول يا سلام بركاتك يا عم الشيخ اقوم داخل عليه هو على طول يبقى أنا وقعت فى الشرك الأكبر يبقى إن أنا أتعبد لله عند القبر ده شرك أصغر ليه؟؟؟ ده أنا بعد ربنا ! ماهو بكره هتدعى صاحب القبر الشيطان هيبيّنك .. زى بالضبط قوم نوح هو قوم نوح

عبدو يغوث ويعوق وغيرهم على طول لا إنما الأول كان الشيطان أوحى لهم بالفكرة ياراجل خلى عندكم كده شوية تماثيل عملوا ليهم تماثيل سنتين ثلاثه عشر عشرين طب ماتدعوا ربنا هنا المكان ده بركة برضو والناس دول صالحين برضو والدعاء هنا أرجى عشرين ثلاثين خمسين سنة عبودهم الشيطان مبيزهقش. نفسه طويل أوى ممكن يقعد معاك مية سنة لغاية ماتعبد صاحب القبر ده معدهوش مشكلة المهم يوم ماتموت تكون كافر بالله سبحانه وتعالى..

بعد كده بيقول الذبح والنحر عند القبور نفس الكلام بيقولك إن كان هذا الذبح والنحر للمقبور يبقى ده شرك أيه؟ شرك أكبر وإن كان الذبح لله لكن أنت جيت وسبت الدنيا كلها وجيت هنا عشان تدبح يبقى هذا شرك أصغر وبدعة منكرة كذلك قد يخص على ذلك من يذبحون مثلاً عند أبواب المحلات وعلى باب السيارات هذا أيضاً من البدع لأن اللي بيدبح ده سؤال أنت لمن تدبح هو في احتماليين إن هو بيدبح للجن ده وارد فاذا كان بيدبح للجن فمش هتفرق معايا المكان يبقى ده شرك أكبر خلصانة تمام

لكن إذا كان قالك أنا بدبح لله قوله طب ليه هنا بالذات قدام الباب يقولك عشان ربنا يبارك في العربية والمحل طب ماتدبح في أي حته ليه هنا؟؟

عند الجزار ادبح في بيتك مش هي لله تفرق أيه هي لله هنا غير لله هنا يبقى تعمد أنه هو يختار مكان معين يدبحها عند العتبه وهات شوية دم وتقد تليط العربية وبعدين ، في معتقدات وفي خرافات هو معتقد عند الباب زى مش عند الباب بكره بقى هيأتى جيل بعد كده مبيفهمش يشوف الناس دى بتعمل كده يقول ده أبويا كان بيدبح هنا ده أكيد في هنا حاجة الدنيا تخش معاك في الشرك الأكبر فتعتمد إختيار الأماكن دى خلل فيه خلل خصوصاً عند القبور لأن القبور بتتطور أوي إذا كان عند المحلات أو كده يكون أهون لكن نقول لا داعى لذلك لأن ده باب شر اللي عايز يدبح لله عشان ربنا يباركله في عربيته في محله ادبح في أي حته ينفع ادبح للمحل أنت مبتدبحش للمحل أنت بتتقرب لله بطاعة عشان ربنا يكرمك في حاجه معينه وده جائز وإلا ربنا سبحانه وتعالى حبيب إلينا أشياء دنيوية وهي في مقابل طاعته الأصل أنك تريد وجه الله فقط لكن لو كان مع الإرادة دى شيء من المنافع الدنيوية لا بأس لكن يكون الأصل وجه الله لكن لو أنت عاوز المنفعة الدنيوية بس هذا العمل غير مقبول لكن أنت الأصل تريد وجه الله والدار الآخرة ثم شيء من المحفزات الدنيوية زى ما ربنا قال " **فَقُلْتُ اسْتَغْفِرُوا رَبَّكُمْ** " استغفر ربنا ليه **!إِنَّهُ كَانَ غَفَّارًا** " بعد

كده حبلنا حاجات كده " يُرْسِلِ السَّمَاءَ عَلَيْكُمْ مِدْرَارًا *وَيُمْدِدْكُمْ بِأَمْوَالٍ وَبَنِينَ وَيَجْعَلْ لَكُمْ جَنَّاتٍ وَيَجْعَلْ لَكُمْ أَنْهَارًا " لكن الأصل أنت بتستغفر إبتغاء وجه الله إبتغاء مرضات الله لكن " مَنْ كَانَ يُرِيدُ الْحَيَاةَ الدُّنْيَا وَزِينَتَهَا نُوفِّ إِلَيْهِمْ أَعْمَالَهُمْ فِيهَا وَهُمْ فِيهَا لَا يُبْخَسُونَ "

الإنسان لا ينبغي أن يريد بالعمل الصالح الدنيا بس بتدبح ليه ؟ عشان المحل بس مش فارق معه أى أجر لا إنما الأصل وجه الله والله عشان ربنا يباركلى فى عيالى يباركلى فى كذا فى عربيتي فى محلي ماشي الإنسان ينتوي هنا جانباً من المنافع الدنيوية التي دل الشرع عل أنه لا إشكال إن الإنسان ينتوي مثل هذه النوايا يبقى أنا لو جيت دبحت عند القبر هذا شرك أصغر ودي بدعة منكرة قال عليه الصلاة والسلام " لا عقر فى الإسلام " كلمه لا عقر فى الإسلام دى مش مفهومة يعنى أيه لا عقر فى الإسلام ؟ لا ذبح ما فيه ذبح إحنا نجيب تفسير العلماء , قال عبدالرزاق صاحب المصنف المشهور كانوا يعقرون عند القبور بقرة أو شاه هو بيقول ده معنى الحديث لا عقر فى الإسلام يعنى العقر طريقة من طرق الجاهلية كانوا قديماً فى الجاهلية بيسيبيوا الدنيا كلها ويروحوا عند القبر يعقر البقرة أو الشاه فنهى النبى صل الله عليه وسلم عن هذا النوع قال لا عقر فى الإسلام ..

بعد كده بيقول من الأمور المنكرة فى القبور رفع القبر زيادة على التراب الخارج منها وتطيف القبر بعمله قبة ومنظر والكتابة عليها والبناء عليها والقعود عليها قال عليه الصلاة والسلام قال جابر **نهى النبى صل الله عليه وسلم** أن يبسط القبر اللى هو يتعمله زى ما إحنا بنشوف كده يتعمله كده ومنظر ويتفخم أو أن يقعد عليه وده معروف ، حرام تقعد على قبر حتى لو الدنيا زحمة حتى لو الدنيا مزنوقة متخشش ويقولك عاوز أوصل جوه مش لازم توصل جوه لاتقف على قبر أبدا قال النبى صل الله عليه وسلم قال لأن أجلس على جمرة من نار فتحرق ثيابى ثم تخلص إلى جسدى أحب إلى من أن أجلس على قبر " **يعنى** **أقعد على جمرة نار أهون من إنى أجلس على قبر شوف بقى عند ربنا أنك تجلس على قبر ثم وتقف عليه بالجزمة أسوأ وأسوأ يبقى الإنسان ميعملش كده أبداً وأنصح غيرك بأدب و قول لو سمحت مينفعش تقف على قبر ، أو أن يبني عليه تبني عليه بقى اوضه كبيرة ومقام وقبة هذا أيضاً من المنكرات ليه ؟**

لأن الحاجات دى بتخلى الحي يفخم أوى صاحب القبر فممكن بقى بكره يعظمه أوى ينتقل التعظيم لترك العبادات لكن لما أنت تشوف قبر متساوى بالأرض يهون عليك المقبور عادى شخص عادى , لكن تشوف واحد معموله قصر تقول لا لا ده جامد أوى لا لا ده دا

على طول نخش بقى ندعيه ننذرله ندبحله وأنوار وأخضر وأصفر وأحمر وزينة مش هنخلص بقى يبقي تزيين القبور يدفن الحي يخليه يحس أن المقبور ده هو المقبور معملش حاجه هما اللى عملوا كده وأن يزداد عليه يزيد عليه يعنى ايه يرتفع عن القدر الشرعي , ايه القدر الشرعي ؟

شبر أو شبرين ده أقصى تقدير قال النبى صل الله عليه وسلم لعلي بن أبى طالب حين أرسله قال لا تجد قبراً مشرفاً إلا وسويته يعنى أى قبر آخره شبر أو شبرين اللى هما شوية التراب اللى إحنا دفنا قبو يعنى زى مثلاً زى ماشوفنا فى مقابر البقيع فى المدينة تخش تلاقى قبه تراب كده بس خلاص هو ده القبر هو ده القبر الشرعي اللى هى شوية التراب المقبيين اللى بيقولوا هنا فى قبر لازم عشان نعلمه مش أكثر .. فهنا أقصى حاجة شبر أو شبرين لكن يزيد على ذلك زي القبور بتاعتنا هذا الأمر منكر ينبغي للإنسان أن يتجنبه قدر ما يستطيع فإن أشتري إنسان مقبرة او عمل لنفسه مقبرة فليراعي أنها متكنش عالية وكده حتى لا يقع في أمر منكر ، أو يكتب عليها يعنى يكتب عليها كتابات زيادة فلان ابن فلان السابق نسيب عائلة فلان وقريب فلان أي يا عم الرجل خلاص ليس له إلا ما قدم لا ينفعه منصب لا ينفع لقب ولا ينفعه قريب ولا ينفعه نسب ولا ينفعه حتى شيء إنما هو بين يدي الملك العلام ليس له إلا العمل .. طيب مينفعش أكتب حاجة؟

اكتب حاجة تعريفية ماشى .. تحط طوبة وتكتب عليها مقابر عائلة فلان ماشى عشان الدنيا متهش منا ، فلان ابن فلان ماشى ، لكن سيادة اللواء السيد المقدم الفقيد العقيد فأيه خلاص بقى هى كلمتين وخلاص ، يجوز الكتابة بقدر الاحتياج لكن الزيادة عن ذلك التباهى والتفاخر .. أصبح فى أمتى من أيام الجاهلية لا يتركوهن **قال صلى الله عليه وسلم: "أربع في أمتي من أمر الجاهلية لا يتركوهن الفخر بالأحساب، والطعن في الأنساب، والنياحة، والتنجيم"** الفخر بالأحساب والطعن في الأنساب والنياحة ونحو ذلك

الفخر بالأحساب دى حاجه هتفضل موجودة فى أمتي على طول فالإنسان يتجنب ذلك .. الإنسان على القبر ميعدش يكتب قصص وحكاوى إنما يكتب أقصى شيء تعريفى لصاحب القبر فيقول كل ذلك من البدع المنكرة ومن أعمال اليهود والنصارى.

٣ تقوى أضعف الأمم

"العقيدة الصحيحة والعلم النافع والأخلاق القويمة"

بعد كده بيقول الصلاة إلى القبور وعند القبور , قال عليه الصلاة والسلام " **لا تصلوا إلى القبور , ولا تجلسوا عليها** " ولا تجلسوا عليها , الصلاة إلى القبر هنا مبتكلمش عن مسجد فيه قبر لسه أنا بقول القبر بس إنك أنت تروح عند قبر تصلى إلى القبر وطبعاً كان الجديد فى العنوان إلا صلاة الجنائز هذه الوحيدة التى شُرعت إلى القبر .. إذا كان القبر فى جهة القبلة أصلاً واضح.. يعنى لا بأس صلاة الجنائز والنبي عليه الصلاة والسلام صلى جنازة عند المقابر لكن لا تصلى فريضة أو نافلة لا يجوز ذلك فمن العلماء من أبطلها بالصلاة ومنها من قال حرام لكنها صحيحة , لا تصلى إلى القبور متخلّش القبر فى قبلك وتصليله أنا مش بتكلم عند مسجد أنا بتكلم عند قبر عادى فى مكانه روت أنت بتصليله ..

عمر رضى الله عنه رأى أنس يصلى عند قبر فما يكن أنس مكانش يعرف إن فى قبر فمر عليه عمر فوجد أنس يصلى وفى أمامه قبر فقال عمر لأنس القبر القبر فرفع أنس رأسه إلى السماء ثم قال عمر القبر القبر فجاوز أنس القبر وأكمل الصلاة فقالوله رفعت رأسك إلى السماء ليه ؟ قال ظننت عمر يقول لي القمر القمر مسمعش كويس سمع ايه القمر القمر فرفعت رأسى إلى السماء بعد كده عرف إن عمر يقول ايه القبر القبر ف ايه راح عدى وخلقى القبر فى ظهره وأكمل الصلاة .. وقال عليه الصلاة والسلام " **الأرض كلها مسجد إلا المقبرة والحمام** " فالإنسان يعنى الأصل أنه ميصليش عند المقبرة لكن أنس أكمل تجاوز عشان يكمل الصلاة فالأصل إن الإنسان ميصليش عند مكان فيه قبور أصلاً المكان اللي فيه قبور لا يصلي فيه وإلا فالنبي عليه الصلاة والسلام لما بين أن الإنسان اللي ميصليش من الأصل فى بيته وصف بيته بالمقبرة قال عليه الصلاة والسلام " **لا تجعلوا بيوتكم قبوراً** " صلوا فيها يعنى متخلّش بيتك قبر يعنى قصدك ايه يعنى متصلّش فيه فكأنه مفهوم بديهي إن القبر مبيتصلاش لا عنه ولا إليه ولا فى الحته اللي يتصلّى فيها تمام فلما أراد يبين أن البيت اللي مش بيصلّى فيه ده عامل إزاي قال ده زي القبر زي القبور ميتصلاش فيها ولا إليها ولا عندها فيبقى المنهي عنه أيضاً الصلاة إلى القبور أو عند القبور بعد كده بيقول الأمر الدافع عنده هو بناء المساجد على القبور ولا شك أن هذه من أخطر البدع والضلالات التي وقعت فيها الأمة ووصي النبي عليه الصلاة والسلام في وصيته التي أوصي بها وصية شديدة عند الموت عن عائشة رضى الله عنها تقول كان النبي عليه الصلاة والسلام في مرض موته يقوم فيقول لعن الله اليهود والنصارى اتخذوا قبور أنبيائهم مساجد يحذر ما صنعوا قالت عائشة لولا ذلك لأبرز قبره ولكنه خشي أن يتخذ مسجداً..

لعن اللعن ده هل يكون في أمر هين أم أمر كبير !! في أمر كبير ،

إذاً بناء المساجد علي القبور هو من الكبائر وعده العلماء في الكتب التي صنفوا فيها الكبائر عدوها من الكبائر بناء المساجد علي القبور لأنه الكبيرة من الأشياء التي تعرف منها دي من الكبائر ولا من الصغائر أن يأتي فيها لعن أول ما النبي عليه الصلاة والسلام يقول أن صاحبها ملعون إعرف إن الحاجة دي علي طول كبيرة لأن مش طبيعي إن حد بيتلعن في أي حاجة اللعن دي حاجة كبيرة فاللعن مبيجيش إلا لو فيه حاجة كبيرة فأني حاجة فيها لعن فهي من الكبائر فقال لعن الله اليهود والنصارى اتخذوا قبور أنبيائهم مساجد يحذر ما صنعوا

..قد يقول قائل ليس مقصود الحديث كما ما بيدعي البعض طبعاً مفيش خلاف في المسألة دي إلا عند أهل الهوى لكن أهل السنة متفقون بالإجماع علي حرمة بناء المساجد علي القبور لكن أهل الأهواء ممكن يردوا علي الحديث ده مش المقصود من الحديث ده إن أنا ابني مسجد علي القبر إنما المقصود إن أنا اصلي إلي قبر النبي فهنقول إن هناك أحاديث أخرى بينت إن ده المقصود .. أم حبيبة وأم سلمة هاجروا إلي الحبشة ثم عادوا من الحبشة وكان هذا في أول الإسلام فحكوا للنبي عليه الصلاة والسلام اللي شافوه في الحبشة قالوله كان في هناك كنيسة دخلنا جواها لقينا رسمين صور جميلة علي الحائط فهما بيحكولوا لسه مش عارفين كل الأحكام فقال النبي عليه الصلاة والسلام قال النبي صلى الله عليه وسلم أولائك شرار الخلق عند الله أولائك إذا مات فيهم الرجل الصالح بنوا علي قبرة مسجداً وصوروا له تلك التصاوير ف إذاً ده حديث صريح يتخذوا المساجد يعني يبني عليه مسجداً ،

وأيضاً فهم عائشة والصحابه من اتخذوا مسجد لذلك قالوا لكنه لولا ذلك أبرز يعني الحقوا بالمسجد يبقي إتخاذ المسجد المقصود في الحديث أن يبني علي القبر مسجد ده اللي دل عليه حديث أم سلمة وأم حبيبة قال أولائك شرار الخلق بص في اللفظ صريح أولائك إذا مات فيهم الرجل الصالح بنوا علي قبرة مسجداً وصوروا له تلك التصاوير وقال النبي عليه الصلاة والسلام ألا فلا تتخذوا القبور مساجد إني أناكم عن ذلك وهذا صريح في النهي عن إتخاذ القبور مساجد طبعاً إتخاذ القبور مساجد له صور لكن فيه صور إحنا لسه قايّلنها إتخاذ القبور مساجد أنك أنت تصلي إلي القبر برا مسجد أو جوا مسجد إتخاذ القبور مساجد أن تبني مسجد علي القبر دي الصورة الثانية هنقيس على ذلك الصور بتاعتها

صورة أنك تصلي إلي القبر أو عند القبر أو تصلي في مسجد فيه قبر يبغي دول الثلاث صور ف إتخاذ القبور مساجد

.. بعض الشبهات حول هذه المسألة الشبهة الأخطر في مسألة بناء المساجد علي القبور تلاقي بعض لما تقوله لا يجوز بناء مسجد علي قبر يقول مسجد النبي عليه الصلاة والسلام أصلاً فيه قبر النبي عليه الصلاة والسلام كيف تزعمون أن المساجد لا تبني علي القبور والنبي عليه الصلاة والسلام قبره داخل المسجد والرد عليها يسير فرد علي هذه الشبهة الأمر الأول هل دفن النبي عليه الصلاة والسلام في المسجد ؟ لأ هل بني المسجد علي القبر ؟

لأ أما دفن النبي عليه الصلاة والسلام أما النبي مات في بيته في غرفة عائشة ، بيت النبي عليه الصلاة والسلام أصلاً لازق في المسجد يعني يفتح الباب يخش المسجد فبيت عائشة لازق للمسجد عائشة هو أقرب بيت للمنبر فأقرب بيت للصف الأول فكان يطلع من بيت عائشة يخش علي طول علي الصلاة فكان النبي عليه الصلاة والسلام كما تعلمون مات في بيت عائشة فالصحابه اختلفوا هندفونوه فين حتي جاء أبو بكر الصديق وفصل في المسألة قال سمعت النبي عليه الصلاة والسلام يقول إن الأنبياء يدفنون حيث ماتوا في المكان الذي يموتون فيه فكل اللي عملوه الصحابه فشاالوا السرير وحفروا تحت ودفنوه فيه عليه الصلاة والسلام وكانت هذه الغرفة التي دفن فيها عليه الصلاة والسلام .. فأولاً النبي عليه الصلاة والسلام دفن في بيته في حجرة عائشة في بيت عائشة رضي الله عنها وأرضاها المسجد كان أصلاً مبني قبل ذلك وطبيعة المسجد لم تحدث بعد دخول القبر إلي المسجد إنما الفضيلة ثابتة قبل موت النبي عليه الصلاة والسلام صلاة في مسجدي هذا بألف صلاة هذه واحدة .. الأمر الثاني إن قست المسافة من القبر إلي المسجد كالاتي أنه في زمن عمر بن الخطاب احتاجوا إلي التوسعة في عام 17 من الهجرة فقام عمر رضي الله عنه بتوسعة المسجد من ناحية عكس البيت بيوسع من وراء وساب البيت خالص مجاش جنبه ثم جاء زمن عثمان احتاج إلي توسعة المسجد فوسع برضو من الناحية الخلفية ولم يأتي من ناحية القبلة تماماً علشان الناحية دي فيه بيت عائشة ولو وسع من الناحية دي هيدخل القبر جوا المسجد واستقر الأمر علي ذلك بعد توسعة عثمان إلي أن جاء خلفه بني أميه ، في خلافة بني أمية جائت خلافة الوليد بن عبد الملك سنه 88 من الهجرة الوليد بن عبد الملك وسع المسجد وسع من الناحيتين من الناحية الأمامية ومن الناحية الخلفية فدخل البيت كله داخل المسجد

كان سنه 88 هجرياً لم يكن هناك صحابياً علي وجه الأرض إنما كان كل الصحابة قد ماتوا لم يكن هناك صحابي واحد في المدينة فكل الصحابة قد ماتوا فلم يشهد أحد من الصحابة هذا الأمر أما ما حصل إن أهل المدينة استنكروا هذا الأمر حتي ذكر في بعض الآثار إن هذا اليوم بكى أهل المدينة لكن ما بيدهم شئ لا يستطيعوا أن يقاوموا خليفة المسلمين ،

وسعيد بن السيد رحمه الله تعالى أنكر ذلك إنكاراً شديداً وممن أنكر ذلك ابن عثمان بن عفان هذا الذي حصل استنكاراً شديداً وكان حصل كلام شديد حصل بينه وبين الوليد بن عبد الملك ، فحصلت الأزمة إن البيت كله دخل لكن القضية مش القبر لأ البيت كله دخل فكأن المسجد اتبني حوالين البيت لا النبي أدفن فيه ولا المسجد اتبني عليه ده البيت كله زي ما هو دخل جوه المسجد للحاجة إلي التوسعة اللي حصل ده غلط ولا صح ده اجتهاد ولكن هذا الذي حصل كان خطأ ما كان ينبغي أن يفعل ذلك لذلك تجد التوسعة اللي ورا القبر صغيرة أوي مفيش حد بعد كده وسع الناحية دي أبداً وكل التوسعة بعد كده الناحية الثانية لكن حصل المأزق هل يجوز إن أنا اهدم المسجد النبوي مينفعش حتي لو جاز ذلك سيؤدي إلي فتنة رهيبة بين المسلمين لو حد جه يهدده دلوقتي صعب جداً إنه أنت تيجي تهدم المسجد النبوي يحدث فتنة بين العوالم ينفع أطلع القبر برة ؟

لا طبعاً هذا أصعب وأصعب هذا لا يجوز علي الإطلاق ، هل زاد فضيلة المسجد بوجود النبي عليه الصلاة والسلام داخله ؟ لا لم تزد فضيلة المسجد ولم تتأثر الصلاة بوجود النبي عليه الصلاة والسلام داخل المسجد ثم إن عائشة رضي الله عنها كانت تصلي داخل البيت اللي النبي عليه الصلاة والسلام مدفون فيه لأنه هذا الأمر كان بأمر شرعي النبي لازم يدفن في المكان اللي مات فيه وهذا بيت عائشة لن تجبر أن هي تصلي خارج البيت ف اللي حصل إن البيت كله دخل جوا المسجد إن فضيلة المسجد لم تزد بوجود القبر ولا يمكن إزالة القبر ولا يمكن هدم المسجد فلذلك هذه حالة إستثنائية

ثم هل يقال هل نضع فعل الوليد بن عبد الملك أمام أحاديث النبي عليه الصلاة والسلام هل الحجة في أفعال الأئمة بعد الخلفاء الراشدين هل الحجة في أفعال أو أقوال النبي عليه الصلاة والسلام على هل دفن الصحابي داخل مسجد؟ لم يحدث ذلك علي الإطلاق لو كان هذا جائز كانوا هم أولي بذلك أبو بكر عمر وعثمان وعلي وغيرهم من الصحابة الكرام لم يفعل الصحابة قط مات كل الصحابة ولم يدفن أحد في مسجد قط وإنما لأول مره يدفن أحد في المسجد

أو نقول أن المسجد شمل بيت النبي عليه الصلاة والسلام في زمان الوليد بن عبد الملك وهذا لا حجة فيه هل يمكن أن نمنع الصلاة في هذا المسجد النبوي ؟

لا يمكن أبداً لأن الصلاة في المسجد مأمور بها شرعاً لا تشد الرحال إلا لثلاث مساجد المسجد الحرام و مسجدي هذا و المسجد الأقصى في هذه الحالة الإستثنائية لا يمكن أن تكون حجة .. الشبهة الثانية في مسألة القبور في قوله تعالى عن أصحاب الكهف " **قَالَ الَّذِينَ غَلَبُوا عَلَىٰ أَمْرِهِمْ لَنَتَّخِذَنَّ عَلَيْهِم مَّسْجِدًا** " هذه أيضاً شبهة قوية والرد عليها يسير بفضل وتعالى أما الأمر الأول : هذه القصة كانت للنصارى يعني القصة دي كانت بعد زمان المسيح ، والآية تقول " **قَالَ الَّذِينَ غَلَبُوا عَلَىٰ أَمْرِهِمْ لَنَتَّخِذَنَّ عَلَيْهِم مَّسْجِدًا** "

هل بناء المساجد علي القبور كان مشروعاً في دين المسيح ؟ لم يكن مشروعاً ايه الدليل ؟ الدليل الحديث لعن الله اليهود والنصارى لو كان هذا الأمر مشروع لما لعن يبقوا اللي عملوه ده منكر ، أي شئ حصل في زمان موسي أو عيسي من هذه الأشياء فهو منكر في هذا النص من الحديث يبقوا اللي حصل ده منكر فما معني قوله " **قَالَ الَّذِينَ غَلَبُوا عَلَىٰ أَمْرِهِمْ لَنَتَّخِذَنَّ عَلَيْهِم مَّسْجِدًا** " صيغة الكلام إن هما كانوا فنتين قال سبحانه وتعالى " **وَكَذَلِكَ أَغْتَرْنَا عَلَيْهِمْ لِيُظِلُّوهُمُ وَنَافِثَاتٍ فِي قُلُوبِهِمُ الْمَنُوتَاتِ ۚ وَأَصْبَحَ لُؤْلُبُ الْمُتَكَبِّرِينَ ۚ** " **قَالَ الَّذِينَ غَلَبُوا عَلَىٰ أَمْرِهِمْ لَنَتَّخِذَنَّ عَلَيْهِم مَّسْجِدًا** " هما الأول كان هيبنا فوقهم بنينا مش مسجد هيسدوا الكهف وخلصا وبعدين التانين قالوا " **قَالَ الَّذِينَ غَلَبُوا عَلَىٰ أَمْرِهِمْ لَنَتَّخِذَنَّ عَلَيْهِم مَّسْجِدًا** "

يبقى أكن الكلام جه لقول فنتين أن إحنا نقفل عليهم الكهف وخلصا ذكرى كذا وخلصا وفئة تانية تقول لأ هنبني عليهم مسجد فربنا قال " **قَالَ الَّذِينَ غَلَبُوا عَلَىٰ أَمْرِهِمْ لَنَتَّخِذَنَّ عَلَيْهِم مَّسْجِدًا** " يعني أيه معني كلمة غلب للي قالوا نبني مسجد ده مش إقرار من القرآن هو حكاية عن اللي حصل اللي حصل أنه فيه فنتين ناس قالوا هنبني فوق القبر وده رأى الأغلبية والأكثر اللي هما معاهم السلطة والقوة

والناس الصالحين قالوا غلط ومينفعش إحنا نقفل المسجد عليهم وخلصا فالي غلبوا هما القضاة زي زماننا دلوقتي جينا اتبني مسجد علي قبر هنقدر نوقفهم ؟ منقدرش نمنعهم الصالحين لو حاولوا يمنعوهم ميقدروش لأنهم أهل الغلبة والقوة يوافق علي ذلك السلطة مش هتمنعهم فخلصا مش هنقدر تعمل معاهم حاجة

لو افترضنا إن ده كان صح هل معني أن ده كان صح في دين النصاري يبقي ده معناه إن عندنا لازم يصح لا ميلز مش إحنا بنقول من القاعدة في شرع من قبلنا شرع لنا إلا إذا جاء في شرعنا ما ينسخه يعني كان السجود في عهد يوسف للتكريم جائز خروا له سجداً ينفع أنا دلوقتي أسجد لحد علشان أعمل معاه واجب لأ لأن النبي عليه الصلاة والسلام نهى عن ذلك فكل تشريع في شرع من قبلنا إذا جاء في شرعنا ما ينسخه لم يعد تشريعاً لنا طيب لو افترضنا إن اللي حصل ده جائز وجاء في أحاديث النبي عليه الصلاة والسلام تنهي عن ذلك يبقي لم يعد الآن دي حجة علي الإطلاق يبقي ده الرد الثاني علي الشبهة الثانية

الرد الثالث إن أصلاً مش ضروري إن هما بنوا المسجد علي الجثث نفسها وده قول بعض العلماء دلوقتي دخلوا جوا كهف الكهف ده قاعدين جواه سبعة بالعافية والدنيا مزنوقة والكهف ده في الصخور إزاي بنوا عليه مسجد صعب صح مش متصور فقال العلماء مبنوش المسجد علي القبر بنوه في الحتة بعيدة عن القبر ده أحد الأقوال بيقول إن هو اتبني مسجد بس متبناش أصلاً علي الكهف هيبنوه فين إذا كان أصلاً الكهف كانوا هما قاعدين فيه بالعافية إزاي بقي مسجد في قول ثاني إن هما بنوا المسجد في الحتة دي بس هما مكنش القبور جوه الكهف أصلاً لأن الكهف عبارة عن صخور يا إخوانا إزاي واحد أدفن في الصخور فأكد لما ماتو طلعوهم برا ودفنوه في الأرض الترابية وبعد كده بنوا في المكان ده مسجد علشان يكون ذكرى... إذا الخلاصة إن الدليل ده بقي محتمل مليون احتمالات والعلماء بيقولوا إذا دليل في احتمالات كتير مينفعش يبقي حجة في المسألة طلع الدليل ده بره مدام مليون احتمالات كدة نرجع للي ملهوش احتمالات ألا تتخذوا القبور مساجد إني أنهاكم عن ذلك ، لعن الله اليهود والنصارى اتخذوا قبور أنبيائهم مساجد

فالأحاديث واضحة صريحة قطعية أما الدليل ده فيه ألف احتمال وإحنا قلنا إن الاحتمال القوي جداً إن العمل ده منكر وإن ده فعل أهل الغلبة وإن اللي حصل ده كان أصلاً منهي عنه في دين النصاري أو في دين المسيح كما بين لنا الحديث فلا يصح الاستدلال في الآية دي علي جواز بناء المساجد علي القبور ،

آخر شبهة أن الشيخ فلان بيصلي في مسجد الفلاني والشيخ الفلان الإمام المحترم كان بيصلي في مسجد الفلاني نقول حتي لو صلي فيه ناس نشهد لهم بالعلم والخير والصلاح لكن لا يوجد أفعال تبقي حجة علي الشرع كل يأخذ منه ويترك إلا النبي عليه الصلاة والسلام فالأشخاص تصيب وتخطئ لكن أنا ليا الدليل قد يكون فلان بيعمل كده قد يكون عنده

شبهة قد يكون عنده تأويل نحن نستغفر لمن فعل ذلك لكن يبقى هو حجة علي الدين لا يكون أبداً

بعد كده بيقولنا إتخاذ القبور عيد يعني تعاد ترحلها كل شوية كأنها عيد قال عليه الصلاة والسلام لا تتخذوا قبوري عيداً

شد الرحال إلي القبور لا يجوز شد الرحال إلي القبور إنما شد الرحال فقط يكون إلي ثلاث مساجد : المسجد النبوي والمسجد الأقصى والمسجد الحرام ، لذلك من الخطأ والخلل إن واحد يروح عمره يقول أنا رايح أزور النبي مثلاً نقول لا أنت رايح تزور مسجد النبي عليه الصلاة والسلام أما زيارة النبي فهي تبع للمسجد ولكن ليست هي المقصودة وإلا لو أنت ناوي تشد الرحال إلي قبر النبي نفسه فهذا لا يجوز لأن قبر النبي لا تشد إليه الرحال إنما تشد الرحال إلي مسجد النبي عليه الصلاة والسلام والزيارة تبعه ، لو واحد راح للنبي ومزرش قبر النبي أصلاً تصح مفيش أي مشكلة حتي لو فيه جفاء و سوء أدب لكن مفيش فيها حرام لأن الزيارة المقصود بيها المسجد من المقصود بيها القبر فمحدث يقول أنا رايح أزور النبي أنا رايح أزور قبر النبي لا أنت رايح تزور المسجد وزيارة قبر النبي عليه الصلاة والسلام اللي هي تبع للمسجد

المطلب الثالث التوسل أمره يسير التوسل قضية مهمة للغاية ما معني التوسل ؟ التوسل هو التقرب لذلك الوسيلة هي القربي إحنا بنقول آت سيدنا محمد الوسيلة والفضيلة يعني الوسيلة يعني القربة لذلك قال اسألوا لي الوسيلة فإنها منزلة في الجنة لا تنبغي إلا لعبد يعني منزلة قريبة أوي من ربنا مينفعش إلا واحد بس يوصلها

فالوسيلة معناها قرب وليس معناها الوسطة مش الوساطة لذلك عندنا الوسيلة جات في القرآن في آيتين بس قال تعالى " **يَا أَيُّهَا الَّذِينَ ءَامَنُوا اتَّقُوا اللَّهَ وَابْتَغُوا إِلَيْهِ الْوَسِيلَةَ** " يعني ابتغوا إليه القربة التقرب مش هي واسطة بينكم وبين ربنا

وقال جل في علاه " **أُولَئِكَ الَّذِينَ يَدْعُونَ يَبْتَغُونَ إِلَىٰ رَبِّهِمُ الْوَسِيلَةَ** " يعني أيه الكلام ده يعني ربنا بيقول إن أنتم أصلاً اللي بتدعوهم دول هما نفسهم بيدعوا ربنا يعني أنت اللي بتدعيه ده هو نفسه بيتقرب إلي الله طيب استفدت أيه أنت بدعائك " **أُولَئِكَ الَّذِينَ يَدْعُونَ** " اللي هما الملائكة والجن والأنبياء اللي بتدعيهم دولة هما نفسهم بيتقربوا لربنا وهما نفسهم بيدعوا ربنا فبتدعيهم ليه " **أُولَئِكَ الَّذِينَ يَدْعُونَ يَبْتَغُونَ إِلَىٰ رَبِّهِمُ الْوَسِيلَةَ** "

يعني يتقربون إلى الله يبغي دي الوسيلة كما ذكرت في القرآن التوسل معناه التقرب إلى الله يعني أيه التقرب إلى الله ؟ ...يعني أنا عايز أقرب لربنا التقرب إليه بيقول بفعل الواجبات وبالمستحبات وبالدعاء ، التوسل بفعل الواجبات واجب والتوسل بفعل المستحبات مستحب وأبىح لنا التوسل بالدعاء إن أنا أتقرب لربنا بالدعاء هو ده اللي هيركز عليه لأن أغلب الخلل في النقطة دي التوسل في الدعاء هيقولنا ٣ أنواع من التوسل بالدعاء مشروعة و ٣ أنواع ممنوعة إيه هي ال ٣ أنواع المشروعة؟

أنا عاوز أتوسل في الدعاء يعني أي أتوسل في الدعاء ؟ يعني
أخلي الدعاء أقوي أقرب أسرع بتوسل يعني بخليه أقرب إحنا
قولنا الوسيلة في الدعاء يعني تقرب الدعاء يعني أقرب الدعاء
بخلية أقرب للإجابة إزاي اخلي الدعاء أقرب للإجابة؟ ثلاث
أشياء مبتكلمش في الآداب بس بنقول حجات شرعها عليه
الصلاة والسلام في طريقة الدعاء



أول شئ : إن أنا أتوسل أضع في الدعاء المقدمة من الأسماء والصفات زي ما النبي عليه الصلاة والسلام ما كان هو ده اللي بنسميه التوسل إلى الله بالأسماء والصفات إن أنا قبل الدعاء أسرد مجموعة من الأسماء والصفات تليق بالدعاء يا حَنَّان يا مَنَّان يا رزاق يا كريم يا حي يا قيوم برحمتك أستغيث اللهم إني أسألك بأن لك الحمد لا إله إلا أنت المنان بديع السموات والأرض ذا الجلال والإكرام اللهم إني أسألك بأنني أشهد أنك الله لا إله إلا أنت الواحد الأحد الصمد الذي لم يلد ولم يولد اللهم أنت ربي لا إله إلا أنت أنت خلقتني وأنا عبدك هي دي طريقة النبي عليه الصلاة والسلام أول ما بيسأل بيسرد مجموعة من الأسماء والصفات التي تليق بمقام الدعاء أنا عاوز أدعي علي الظالمين أقول يا عليّ يا عزيز يا ذا القوة المتين عاوز أدعي بالرزق يا رزاق يا رحيم يا منان يا كريم يا وهاب عاوز أستغفر يا رحيم يا ودود يا غفار فكل مقام هيناسبه شئ من الأسماء والصفات فده طبعاً مشروع قال تعالى " وَلِلَّهِ الْأَسْمَاءُ الْحُسْنَىٰ فَادْعُوهُ بِهَا "

التوسل الثاني

إن أنت في دعائك تتوسل إلي الله بذكر شيء من العمل الصالح إنك أنت الأول تقول بعض الأعمال تكون ترجوا من الله إنها تكون صالحة وبعد كده تطلب الي أنت عايزة وده في القرآن الكريم كتير وفي السنة كتير قال جل في علاه عن بعض الأقوال " رَبَّنَا إِنَّا أَمْنَا فَاغْفِرْ لَنَا ذُنُوبَنَا وَقِنَا عَذَابَ النَّارِ " ده إسمه توسل بعمل صالح

" رَبَّنَا أَمْنَا بِمَا أَنْزَلْتَ وَاتَّبَعْنَا الرَّسُولَ فَاكْتُبْنَا مَعَ الشَّاهِدِينَ " ده

إسمه توسل بالعمل الصالح

أنت أصلاً بتعمل الموضوع ده كل يوم وفي كل صلاة " إِيَّاكَ نَعْبُدُ وَإِيَّاكَ نَسْتَعِينُ (٥) اهْدِنَا الصِّرَاطَ الْمُسْتَقِيمَ " خدت بالك أنت بتتوسل بالأسماء الحسني أصلاً قبلها " الْحَمْدُ لِلَّهِ رَبِّ الْعَالَمِينَ (٢) الرَّحْمَنِ الرَّحِيمِ (٣) مَالِكِ يَوْمِ الدِّينِ " ادي توسل بالأسماء الحسني بعد كده إياك نعبد وإياك نستعين توسل بالعمل الصالح ، بعد كده السؤال أبداً بقا بالفتح أفهم بقا أنت بتعمل إيه أنت الأول بتتوسل بالأسماء والصفات بعد كده بتتوسل بالعمل الصالح علشان تقرب الفائدة بتاعت الفاتحة كلها اهدنا الصراط المستقيم فاستمتع بقي وأنت بتتوسل إلي الله باهدنا الصراط المستقيم إزاي تتفنن فيها إن أنت تركز أوي في أول أربع آيات دول " الْحَمْدُ لِلَّهِ رَبِّ الْعَالَمِينَ (٢) الرَّحْمَنِ الرَّحِيمِ (٣) مَالِكِ يَوْمِ الدِّينِ (٤) إِيَّاكَ نَعْبُدُ وَإِيَّاكَ نَسْتَعِينُ " يبقي ده التوسل الثاني الجائز عندنا التوسل الأول الأسماء والصفات التوسل الثاني بالعمل الصالح ، ومن التوسل الثاني جه الحديث المشهور بتاع أصحاب الغار اللي اتسدت عليهم صخرة فقال " إِنَّهُ لَا يُنْجِيكُمْ مِنْ هَذِهِ الصَّخْرَةِ إِلَّا أَنْ تَدْعُوا اللَّهَ بِصَالِحِ أَعْمَالِكُمْ "

فواحد بقي ذكر بر الوالدين ليه قصة مع بر الوالدين قال اللهم إن كان هذا العمل خالصاً لوجهك ففرج عنا ما نحن فيه فانفرجت الصخرة ولكنهم لا يستطيعون الخروج جاه الثاني توسل بالعفة اللهم إن كانت بنت عمه وكان يعمل معرفش أي فتركها بعد ما كان قرب خلاص يقع في الفاحشة اللهم إن كان هذا العمل خالصاً لوجهك ففرج عنا ما نحن فيه فانفرجت الصخرة شوية لكن لا يستطيعون الخروج جاه الثالث وكان فيه أجير

وجه واشتغل عندي ونسي يأخذ فلوسه ومشى فشغلته فلوسه لحد ما بقت حاجة كبيرة أوي فلما جه قالي عاوز فلوسي اديته كل الحاجات دي ومعطاش لنفسه حاجة اللهم إن كان هذا العمل خالصاً لوجهك ففرج عنا ما نحن فيه فانفرجت الصخرة فخرجوا يمشون فالإنسان ممكن يتوسل بالعمال الصالح ينبغي الإنسان أن يفكر في هذا الأمر جيداً أنت الآن لمن تتوسل لازم يكون عندك عده من عمل صالح ليوم فيه صخرة صخرة هم صخرة غم صخرة كرب صخرة دين صخرة ضيق صخرة مرض كيف ستفرج أمورك إذا لم يكن عندك عمل صالح تتوسل بيه لو كنت أنت الرابع في الغار وجاء الدور عليك ماذا كنت ستقول لازم نفكر كويس كنت هقول أيه لو مكنش عندك إجابة واضحة فيه عمل كده حاسس أنه أرجي عمل عندك عند الله يبقي تعمله دلوقتي ودور عليه وحاول تسعي إليه



من التوسل : التوسل بدعاء الرجل الصالح إن أنت بتتوسل إلي الله بدعاء رجل صالح إن أنت تخلي رجل صالح يدعوا لك وهذا جاء في القرآن والسنة قال أبناء يعقوب لأبيهم " **قَالُوا يَا أَبَانَا اسْتَغْفِرْ لَنَا ذُنُوبَنَا إِنَّا كُنَّا خَاطِئِينَ** " وجاء عن النبي عليه الصلاة والسلام إنه حكى عن أويس القرني خير التابعين إذا رءاه منكم أحد فليطلب منه إن يستغفر له فعمر رضي الله عنه قد يستناه لغاية ما جاء المدينة فقال له أنت أويس القرني أنت من بلد كذا أنت كان ليك طلب ودعيت ربنا بأبيك وأمك قاله أيوه قاله استغفر لي قال غفر الله لك يا عمر فيجوز الإنسان يستحب الإنسان إذا وجد رجل صالح إن يطلب منه ان يدعوا له ووطبعاً يركز علي الأمور الأخروية ، أمور الدنيوية أمرها هين لكن يركز علي الأمور الأخروية من صلاح الحال وصلاح الأمر فدي الثلاث أنواع من التوسل المشروع التوسل بالأسماء الحسني والصفات العلية والتوسل بدعاء الرجل الصالح والتوسل بالعمل الصالح يبقي كده إحنا قولنا ٣ أنواع من التوسل المشروع فيبقي لنا ٣ أنواع من التوسل الممنوع....

أخيراً فيه جزئية صغيرة نسيتها أقولها لكم وهي حكم الصلاة في المساجد التي بها قبور هذه المسألة فيها كلام من أهل العلم لكن خلاصة الكلام أن المسألة تنقسم شقين الشق الأول إن شخص جاء إلي المسجد من أجل القبر يعني هو جاي إلي المسجد ده علشان فيه قبر شايف المسجد ده بركة المسجد ده أفضل من غيره المسجد ده نروحله ونصلي فيه

أنا عايز أروح هناك بالذات أصلي في المسجد ده فالعلماء في هذه الصلاة علي قولين القول الأول أن الصلاة باطلة القول الثاني أن الصلاة صحيحة ولكن الشخص ده فعل فعلاً محرماً أنه صلي في مسجد فيه قبر وهو يعلم أنه فيه قبر وهو جاي مخصوص علشان القبر زي الواحد يقولك أي **أبو العباس والبخيري** وغيرهم لو أنك رocht مخصوص علشان المسجد ده مسجد فلان أو مسجد المقبور الفلاني فصلاتك عند أهل العلم إما باطلة وإما صحيحة مع البدعة

المسألة الثانية إن الشخص ده دخل المسجد و هو عارف إن فيه قبر بس مش فارق معاه ولا يهمله هو لقي مسجد صلي فيه وخلّاص قبر مقبرش هو الموضوع ده مش في باله ولا يعنيه ولا المسجد ده يفرق عن غيره دخل يصلي وخلّاص المسألة دي علي قولين من أهل العلم القول الأول أن الصلاة صحيحة والشخص ده يأثم القول الثاني أن الصلاة مكروهة ولا إثم فيه صحيحة لكن مع الإكراه.

لو دخل المسجد ولقي قبر ولا يريد القبر ولا يشغل باله هو دخل عدي لقي مسجد ودخل صلي في المسجد والمسجد ده كان فيه قبر فالصلاة إما صحيحة مع الإثم أو صحيحة مع الإكراه يبقي الاحتمال الثالث دخل يصلي في المسجد بعد ما صلي اكتشف إن فيه قبر فالصلاة دي صحيحة لافيه كراهه ولا إثم ولا شئ علي الإطلاق يبقي ده اختصاراً مجمل للعلم في صلاة الرجل في المسجد اللي فيه قبر نكمل المره اللي جاية إن شاء الله في التوسل الممنوع وده درس خطير إن شاء الله المرة القادمة نسأل الله سبحانه وتعالى أن يتقبل منا ومنكم صالح الأعمال

انتهى الدرس ٦

أن تعثرت فبادر، وإن وقعت
فانهض ..

يدنا في يدك حتي نصل سوياً بإذن
الله.